

# 1 Samuel

## Samuel ana buka tagogi

## Pariverena

Buka 4 ma Samuel ana buka i vinao da Israel ma Judah ai vigulau riwana i parivereta, Samuel tauna wavana naenaena wei bukana tagogi au orana. Tauna mai Israel ai *taurauetara* damona. Tauna, Saul ma David au kolai monamona i waġi da i vigulau, lamna aubaina wei bukana i viwavai Samuel. Wei bukana mai Israel ai kaua e bababaniei i nae da Saul ana au iraġe.

### **Vinevinei**

Samuel ana tupua (1; 2:1-11; 3:1-21)

Mai Israel gulau i vibaġei (8:1-22a)

Samuel Saul i buloi (9:1-3, 15-16, 10:1-2, 5-24)

Saul i vivibada (11:14-15; 13:13-14; 15:1-4)

BADA Saul i geduaiei (15:7-23, 27-29, 34-35)

Samuel David i buloi (16:1-7)

Saul David i unurei (18:7-9)

David Saul i ruba-tawanei (21:1-6)

Saul ana iraġe (31:1-5)

### *Samuel i tupua*

<sup>1</sup> Oroto tagogi wavana Elkanah, ana dam Ephraim ma ana melaġai Ramah, Ephraim au olana i mae. Elkanah amana Jeroham, ġoġana Elihu ma noina Tohu, ma ai bariawa Zuph, ai dam Ephraim.

<sup>2</sup> Tauna awawana ruāġa Hannah ma Peninah. Peninah i vinatuna ma Hannah aipoi.

**3** Madeğana patapatana Elkanah Ramah i netawanei ma i nae au Shiloh da BADA VIVIREWAPANA KAUKAUANA ita voepaepai ma pulo ita apui awarina. Weka Eli natunatuna Hophni ma Phineas BADA ana pirisi pulo tauapui i mae.

**4** Maranai Elkanah pulo i apuapui ma sia sikasikana i ġutai da awana Peninah ma natunatuna i patai.

**5** Wate awana Hannah sia vinevinena i verei aubaina awana nuanuana i vai-kauei avena da BADA i kauei da tauna aipoi.

**6** BADA Hannah manawana i gudui ma lamna aubaina turana i vivinamei ma i vivijiboġa-nonoei da ita vinuabolai.

**7** Wei kauana i mae madeğana patapatana. Maranai Hannah i nae BADA ana au numa, Peninah tauna i vivinuabolai ma i vitoutouni da eġa ita amam.

**8** Maranai Elkanah awana Hannah i paripari-dadanei, “Hannah aiwai e toutouei? Aiwai aubaina eġa uta amam? Aiwai aubaina e vivinuabola, natunatum eġa lamna e vivinuabolei bo? Tau weka! Natunatum nelarai 10 epaiai!”

**9-10** Mara tagogi maranai taui i am vorovei BADA ana au numa au Shiloh, Hannah orana i viara kaua ma ana toutouna BADA awarina i raupari. Pirisi Eli kampa ana au gabu tempol au metaetana i kiakiala.

**11** Ma i parivainuaġana i pa, “Oo BADA VIVIREWAPANA KAUKAUAM. Ma inanai am taunola au oratou uta inanai! Ma uta notaiu ma eġa nuanuam ina vuru. Mepa da natu orotona uta vereu lamna teverana ana veremelem da ina vilaragem ana au lawana au anatapuna, ma aparana eġa ina bori-

dadanei.”

<sup>12</sup> Ma i raraupari BADA awarina ma Eli tauna ipirina i 'nainanai.

<sup>13</sup> Hannah au nuanuana i raraupari ma ipirina ava i vidagudagu wate ega babani ita opuopu. Ma Eli i notai da tauna i uma-bua,

<sup>14</sup> ma awarina i riwa, “Ina baem bo, uma bua ma voterei!”

<sup>15</sup> Wate Hannah i paribelei, “Ega nanare au bada tau ega waira bagibagina ata umai, tau au nuabola i rata kaua ma lamna aubaina a toutou BADA awarina.

<sup>16</sup> Wenanare a raraupari aubaina nuanuau i bolas-kaei ma ega ma notai da tau wavine apoapoeu.”

<sup>17</sup> Eli i paribelei, “Ana nuaubam ma nael! Ma BADA Israel ana God am vibaaga ina kaei.”

<sup>18</sup> Tauna i paribelei, “Au bada egualau kaua ma ega ma nota-boaiu.” Ma i nae ma i am da orana i uba.

<sup>19</sup> Ma ubaubanai boibogi Elkanah ana numa ravai i vomairi ma i nae da BADA i raudunelei ma i gaira me au Ramah. Elkanah awana Hannah maiteni i matave ma BADA wavine ana pari i paribelei.

<sup>20</sup> Hannah i duama ma natuna orotona i guni ma wavana i gorei Samuel ma i riwa, “Wei lamna aubaina BADA a vibaagi.”\*

### *Samuel i puloei BADA awarina*

<sup>21</sup> Ma madega gelauna i getai ma Elkanah ana numa ravai maiteni i gae au Shiloh da pulo ita apui BADA awarina ma pulo gelauna BADA i parivainuaGANI ita kaei.

---

\* **1:20:** *Samuel* ponu Hebrewei nonorana me God awarina agu i vibaagi.

<sup>22</sup> Hannah ega maiteni ita nae ma awana i riwei, “Maranai tevera ina eda ma ana gaiei BADA ana au numa ma kampa ina mae-nonoa.”

<sup>23</sup> Elkanah i paribelei, “Ee nanare aiwai e notanotai da i ai ma kauei, ma weka ma mae da tevera ina eda. Ma BADA ina voagum da am parivainuaðana anona ina tupua.” Ma wavine au numa i mae da natuna i eda.

<sup>24</sup> Maranai tevera i viedai ma alona i naiei au Shiloh, bulumakau orotona ana madeða tonuða, palawa baikena tagogi ma wine wagina ñaeðaena maiteni. Avena da tevera melamelana ma alona i naiei da Eli au urana i terei.

<sup>25</sup> Ma burumakauna i apui God awarina ma tevera i naiei Eli awarina.

<sup>26</sup> Ma Hannah i riwa, “Oo BADA e notanotai rorova tau weka a raraupari BADA awarina.

<sup>27</sup> BADA a vibagai wei teverana aubaina ma a vivibagei i vereu.

<sup>28</sup> Lamna aubaina marina natu a vereverei BADA awarina. Ana lawana anatapuna BADA ina verei.” Ma kampa taui BADA i voepaepai.

## 2

### *Hannah ana voepaepa*

<sup>1</sup> Ma Hannah i raupari BADA awarina i pa, Tau a vinuaiai kaua BADA awarina; Tauna rewapania i vereu.

A vinuaiai aubaina Tam u vilawaniu  
ma lamna aubaina au ñavia a vivinamei.

<sup>2</sup> Oo BADA ega aiai ñelauna vivivireina me tam;  
ega mepa god ñelaui anina tam ava;  
ega taugagalo ñelauna me tam, ai God.

- 3 Tau a ririwa, “Vogulagulau ma pari-gulagulau  
ona voterei;  
Mae-ḡaeḡae babanina ona voterei.  
Aubaina BADA ami kaua anatapui e araramanei  
ma ina kovoḡimi.”
- 4 BADA Tam sorodia vivirewapanai ai pidu  
u viaigaigai;  
wate vovokokarai u vovai-virewapani
- 5 Amam iauai marina ina nola da ina am;  
am-irairaḡei eḡa am ina iraḡe.  
Wavine aipoina roaroa 7 i ḡuni;  
wate roaroa maḡamaḡaui aloi i netawanei ma  
tauna ava e mamae.
- 6 BADA, iraḡe ma lawana e neineiai;  
Tauna rava au kokoaga e teretere-ḡairei ma  
e vovovai-mairini.
- 7 BADA rava ḡelaui e vivimaurai ma ḡelaui  
e vivigomari;  
ma ḡelaui e teretere-ḡairei ma ḡelaui e teretere-  
ḡaiei.
- 8 Tam rava molamolakai pokau au orana  
e sinasina-epai;  
ma rava vigigimanai logilogi au orana  
e sinasina-epai; da gulagulau maiteni  
e kiakiala  
ma vigulau taui ina viḡariei.

Dobu anatapuna tam ḡarimei;  
ma aiwai anatapuna ana au animae u terei

9 Tam am rava patupatutui e gagagaloei;  
ma apoapoe taukauei e amoamoau iraḡe  
Rava eḡa ai rewapanai ita vovaiuba;

10 Tam am ḡavia ma pupuni;  
am meji ina viarapawa me waiparara

BADA tam dobu ma rauetarei  
 ma am gulau ma vovai-virewapani,  
 ma am vinevine bulobulona ina virewapani  
 kaua.

<sup>11</sup> Elkanah natuna Samuel i voterei ma i nae me  
 ana au melagau au Ramah. Samuel pirisi Eli au  
 urana i mae au Shiloh ma BADA aubaina i vitaunola.

*Maranai Samuel i rarata tauna au numa gara*  
*i vovoagu da God ana nola i kaukauei. God ma rava*  
*Samuel ana nola i ġoana-kauei. Eli natunatuna*  
*ruaġa pulo tauapui, pirisi apoapoei. Maranai*  
*rava i nei da ai ġoa apoapoe aubaina pulo i apui*  
*BADA awarina, taui wei siai vovivirana i voviviri*  
*da i amam. Ma lamna aubaina Bada peroveta*  
*i paritawanei da Eli i riwei da tauna natunatuna eġa*  
*ita vinua-terenei aubaina ġo'apoapoe i kaukauei, ma*  
*natunatuna ina virāġena ruāġei. Wei au murina Eli*  
*ana epaepaia laragai ma anatapui ina iraġe-pai.*

### 3

#### *BADA Samuel i ġorei*

<sup>1</sup> Wei au marai BADA eġa rava awari ita bababani  
 bo ai au rauboni bo ai au inana ita vivieġana-  
 melei, mara tagotagogi ava wei i tuputupua. Tevera  
 Samuel Eli i voagui ma BADA awarina i vitaunola.

<sup>2</sup> Eli matana i apoapoe kaua ma eġa ita inainana  
 kaua. Ma waguvvara tagogi ana au gabu  
 i matamatave.

<sup>3</sup> Ma Samuel BADA ana au numa i matamatave  
 Parivainuaġana bokisina au ririvana ma God ana  
 rampa au Gabu vivivireina i ararata.

<sup>4</sup> Ma BADA Samuel i ġorei, “Samuel!”

Ma Samuel i paribelei i pa, “Ee tau weka!”

<sup>5</sup> Ma i vomairi ma i ruba Eli awarina ma i riwa, “U ġoreu da a nei.”

Eli i riwa, “Eġa ata ġorem, ma nae me da ma matave.”

<sup>6</sup> Ma BADA i viġore me, “Samuel!”

Samuel i vomairi me ma i ruba Eli awarina ma i riwa, “U ġoreu da a nei.”

Eli i riwa, “Natu tau eġa ata ġorem ma nae me da ma matave.”

<sup>7</sup> BADA eġa Samuel awarina ita babani dadana lamna aubaina ponana eġa ita aramanei.

<sup>8</sup> Anina ma mara vitonuina BADA i viġore ma Samuel i vomairi ma i nae Eli awarina ma i riwei, “U ġoreiu da a nei.”

Anina ma Eli i aramanei da lamna BADA tevera i ġoreġorei.

<sup>9</sup> Ma Samuel i riwei, “Ma nae me da ma matave. Mepa da ina viġore me lamna wenanare ma riwei, ‘BADA ma babani, am taunola a rarautaniġana.’”

Anina ma Samuel i nae me da i matave.

<sup>10</sup> Ma BADA i nei ma i mairi ma i viġore me au naona i kaukaueia nanare, “Samuel, Samuel!”

Samuel i paribelei i pa, “Ma babani am taunola a rarautaniġana.”

<sup>11</sup> Ma BADA Samuel i riwei, “Tau kaua vivi-nirovorovo kaukauana ana kauei mai Israel awarii ma maranai rava riwana ina nonori taui orai ina sisi.

<sup>12</sup> Rorova a riwa nanare, Eli ana numa ravai maiteni ana kovoġi.

<sup>13</sup> A riwana-guratei da ana numa ravai ana kovoġa-nonoei aubaina natunatuna i vijiboġju

ma i vinimalamalaiu ma tauna natunatuna i vibae-naenaelei.

<sup>14</sup> Riwa bagibaginei a ririwa da Eli ana numa ravai ai āgo'apoapoe eāga melanai ana nota-tawanei. Avena da pulo ina apui awariu."

<sup>15</sup> Samuel ana au aravi i mae da mara i tom ma BADA ana numagara metaetai i votawatawanei. BADA aiwai Samuel i riwei tauna i rovo da Eli ita pariverei.

<sup>16</sup> Wate Eli Samuel i āgorei i pa, "Samuel natu."

Ma i paribelei i pa, "Tau weka."

<sup>17</sup> Eli i paridadana, "BADA aiwai i riwem? Anatapuna ma riwei ma eāga lamna BADA ina kovoāgaguratem!"

<sup>18</sup> Anina ma Samuel anatapuna i riwei, eāga aiwai ita tajijini. Ma Eli i riwa, "Tauna BADA, ma aiwai awarina i jijimana ina kauei."

<sup>19</sup> BADA Samuel i mae-ratui maranai i rarata ma Samuel aiwai i ririweia ma nanare i tuputupua.

<sup>20</sup> Ma Israel au giana da au giana, au Dan i vikarei da au Beersheba, anatapui i aramanei da Samuel lamna BADA ana peroveta.

<sup>21</sup> Mara i maāga BADA au Shiloh Samuel awarina i eāga ma i babani.

## 8

### *Mai Israel Gulau i vibāgei*

<sup>1-2</sup> Samuel natunatuna ruaāga, natuevou wavana Joel ma umauna Abijah. Maranai Samuel i magura ma natunatuna i vinei taurauetara au Israel ma i terei da au Beersheba i nola.

**3** Wate taui ēga amai ana kaua ita vaia ma ai nuavaina mane ma lamna aubaina manelei i gwalai ma rauetara i vibarai.

**4** Ma lamna aubaina Israel babadai i riei Samuel awarina au Ramah.

**5** ◊Ma i riwei, “Ma rautanīgana bada! Tam u magura ma natunatum ēga am kaua ita āgoavaitei. Ma lamna aubaina tauai a āgoei da gulau ma verelai da ina raveniai, me dobu āgelaui ravai e kaukauei nanare.”

**6** Wate maranai wenanare i riwa Samuel ēga ita vinuaiai dadana, ma i raupari BADA awarina.

**7** BADA i paribelei i pa, “Aiwai anatapuna ravai e ririwem ma kaei, taui ēga tam ita geduaiem wate Tau ai gulau i geduaieu.

**8** Maranai Egyptei a teretere-opunei da wei paratana, taui marana patapatana i mae-puputeu ma god āgelaui i raraudunelei; marina nanare tam awarim e kaukauei.

**9** Ai āgoana ma verei wate riwa bagibaginei ma riwei menanare gulau ina kauanei taui awari.”

**10** Samuel BADA ana babani anatapuna taui gulau i vivibāgei i riwei

**11** i pa, “Maranai gulau ina vibademi lamna awarimi wenanare ina kaei. Tauna natunatum i ina tama-naiei sorodia da ana chariot ma ana horse ina gerui ma āgelaui ana chariot au naona ina ruba.

**12** Āgelaui sorodia 1,000 ma āgelaui 50 ina vibadei. Āgelaui ana wapu ina ipiei ma ana lam ina tuarui. Āgelaui āgavia apiai iramei ma chariot iramai ina kaukauei.

---

◊ **8:5:** Deu 17:14

<sup>13</sup> Gulau, natunatumii guguinii ina egari da ana monamona ġabuġabui ina kaukauei ma ġelaui ana palawa ina apuapui ma ana taulauvoa.

<sup>14</sup> Am wapu ma grape wapui ma nanare olive wapui aiaii avavai ina vaia da ana gabemani babadai ina verei.

<sup>15</sup> Ma maranai ami witi ma grape ma olive o tuarui ma ġuta 10 ona terei ma tauna ġuta tagogi ina vaia ma ana gabemani babadai ina ġutei.

<sup>16</sup> Ami laraga nelarai ma guguini ma am bulumakau ma donkey vinevinei ina vaia tauna aubaina.

<sup>17</sup> Ma ami sipu ma gote ġuta 10 o terei ma tauna ġuta tagogi ina vaia tauna aubaina, ma taumi ina vainimi ana taunola.

<sup>18</sup> Maranai wei kauai i tupua ma ona tou guratana BADA awarina da gulau taumi o tereterei awarimi ina vaitawanei, wate BADA eġa ina voaguimi.”

<sup>19</sup> Wate rava Samuel ana babani bagibagina eġa ita rautaniġanei. Taui i riwa, “Tauai anatapuiai a ġoei da gulau ina vibadelai,

<sup>20</sup> da tauai me dobu ġelaui ravai nanare ma ai gulau ina raveniae ma ana opu viġavia aubaina.”

<sup>21</sup> Anina ma Samuel BADA i riwei aiwai ravai i ririweia

<sup>22</sup> ma BADA i paribelei i pa, “Ai ġoana ma kauei, gulau ma verei.”

Ma Samuel ravai i paritawanei ai au numa.

<sup>1</sup> Benjamin ana au dam rava tagogi wavana naenaena ma manemanena i mae wavana Kish. Tauna amana Abiel, ġogħana Zeror ma noina Bekorath ma ai magura Aphiah, Benjamin ana damei.

<sup>2</sup> Kish natuna Saul i tupua kaua ma laraga inanana aiaina eġa me laraga ġelaui au Israel, ma tevera ae manawa.

<sup>3</sup> Maratagogi Kish ana donkey i kwako ma natuna Saul i riwei, “Am taunola ma taravaini ma ona nae donkey ona baiei!”

Saul ma ana taunola donkina i baiana-guratei wate eġa ita nelaġai ma i nae da peroveta Samuel ita raugenari da ita vibaġai da mepa donkey ita baiei.

<sup>15</sup> Ma maratomna da Saul ana taunola maiteni ita ġeta Samuel awarina, BADA Samuel i riwei,

<sup>16</sup> “Wenanare marana au maratom oroto laraġana Benjamin ana damei ana paritawanei. Olive monamonanei kolana ma buloi da ina vimataira da tauna a tereriei da au rava Israel ina vibadei. Tauna mai Israel ina voagui da mai Philistia ina vovaiubai. Au rava mai Israel a inanai i vinuapoapoe ma ai tou awariu agu aubaina a nonori.”

## 10

<sup>1</sup> Ma Samuel olive monamonana wagina i vaia ma monamona i waġi Saul au kolana. Ma i vigilaġolaġonei ma i riwei, “Wei a kaukauei aubaina BADA i terem ana rava vinualaulaunai Israel ma vibadei.

<sup>2</sup> Amadodo rava ruāġa ma nebelei Rachel ana kokoaga au ririvana au Zelsah, Benjamin ana au dobu. Taui ina riwem, ‘Donkina o baibaei i nelaġai.

Ma marina amam eāga donkey ita baibaiei wate tam e vivinuabolem, e paripari-dadana, Menanare natu ana nelağanei.'

<sup>5</sup> —Ma ona nae God ana au Gibeah ola aburuna, weka mai Philistia ai sorodia i rauğaravu. Ma ona ruirui au taon ma Peroveta borui olei ina ġaiğairai. Taui gitar\* ma harp, tambourine ma duraio ina vikalokaloei ma BADA ana babani ina garagararei.

<sup>6</sup> BADA Aruana Vivivireina ana rewapanana oram ina naeni da ina vibadem, ma taui maiteni BADA ana babani ona jimei. Ma oram ina ravivouni da tam me rava ġela.

<sup>7</sup> Maranai wei kauai i tupua, aiwai BADA e viviatataiem ma kaeui."

<sup>8</sup> Samuel i riwa, "Tam ma vinao au Gilgal, ma kampa ana nebelem da ġamoğamo ana vunui ma taputapuna ana apui ma ġamoğamo ġelaui ana apui viturana pulona. Wate kampa ma vipaipai aupom 7 da ana ġetai ma riwa ġelaui ana riwei."

### *Saul i terei gulau*

<sup>9</sup> Ma Saul i mae-tavirei da i nenea ma God ana nota i ruini ma orana i ravivouni. Wei marana aiwai anatapuna Samuel i ririwei i tupua.

<sup>10</sup> Maranai Saul ana taunola maiteni au ola Gibeah i ġeta, peroveta borui i 'nanai i nenei awarii. Anina ma God Aruana Saul i ruini ma i vibadei da tauna maiteni God ana babani i garagaraei.

<sup>11</sup> Maranai ravai Saul i araramaneia Saul i 'nanai peroveta au borui i jimajima taui orai i auepai ma

---

\* **10:5:** Eng. lyre

ai rava i ririwei, “Riwa kaua bo aiwai i tupua Kish natuna awarina? Saul i viperoveta bo?”

<sup>12</sup> Ma nai dobuna ravana i paribelei i pa, “Amana aiai lamna avena aubaina maraġela ravarava ota e viviperoveta.” Anina ma wei babanina i mae kampa, “Moina riwa kaua da Saul peroveta?”

<sup>13</sup> Ma Saul jima i voterei ma i ġae au ola au dobu vivivireina.

<sup>14</sup> Muriai maiana Saul ana taunola maiteni i nelāgai ma i paridadanei i pa, “Mepa o nae?”

Saul i riwa, “Donkey a baibaei ma a baiana-avei da a nae Samuel awarina da ata paridadanei ġamogħamoi mepa.”

<sup>15</sup> Maiana i riwa i pa, “Ma riweu Samuel aiwai i riwem.”

<sup>16</sup> Saul i paribelei, “I riwelai da donkina i nelāgai.” Wate maiana eġa ita riwei Samuel aiwai i riwei, da tauna ina vigulau Israel aubaii.

<sup>17</sup> Muriai Samuel mai Israel anatapui i ġorei da ita riei au Mispa da BADA riwana ita nonori.

<sup>18</sup> Ma Samuel i riwa, “BADA Israel ai God wei e ririwemi, ‘Tau noinoimi mai Egypt vivirewapanai au urai a vaitawanei. Ma a neiaimi wei au dobuna ma nanare ami ġavia au ririvami a vovaiubai.

<sup>19</sup> Wate amadodo tau ami God o geduaiei, i kauana-guratei ami au nuabola ma ami au piripiri.’ Ma o riwa, ‘Eġa! Tauai gulau a ġoegħoei da ina vibadelai! Lamna aubaina dam damai ona opui tau ami BADA au naou.”

<sup>20</sup> Maranai Samuel damdamai i neiai BADA au naona ma BADA Benjamin ana dam i vinei.

<sup>21</sup> Ma Benjamin ana dam i neiai au naona ma BADA Matri ana epaepaia i vinei ma kampa BADA

Kish natuna Saul i vinei. Ma maranai i baibaei tauna kampa ēga.

<sup>22</sup> Ma lamna aubaina i raupari BADA awarina, “Tauna mepa?”

BADA i paribelei, “Tauna kampa purapura au orai e raraugovāga.”

<sup>23</sup> Taui i nae da i taravaini da i neiai, tauna rava aena manamanaina ma i mairi ma rava anatapui i votani.

<sup>24</sup> Samuel rava anatapui i riwei, “BADA rava i tereriei da ami gulau, o inainai bo ēga? Ēga aiai āelauna au orata me wei orotona.” Ma rava anatapui i garara, “Gulau ana lawana ina manawa.”

## 11

### *Saul ana vigulau i vianinei*

<sup>14</sup> Muriai Samuel mai Israel i riwei, “Ona nei ma anataputa tana nae au Gilgal ma Saul ana vigulau tana vianinei ma tana amei.

<sup>15</sup> Anina ma anatapui i nae au Gilgal ma BADA i voepaepai ma i riwei da Saul lamna taui ai gulau. Ma taui viturana ma mae-kaua pulona i apui Bada awarina ma mai Israel siana i am ma i uma ma i vinuaiai-kaua.”

Saul ana madēga 30 maranai i vigulau. Tauna sorodia maiIsrael i rau-etalareni da mai Ammon maiteni i vīgaīgaiawa da i vovaiubai. Muriai taui mai Philistia maiteni i vīgaīgaiawa, Wate nai ravai ai sorodia i māga guratana aubaina da mai Israel i rovo. Saul i vipaipai da Samuel ita nae da BADA ita puloi ma muriai ita nae ita vīgaīgaiawa. Wate Samuel ēga lāgilagina ita nei. Lamna aubaina Saul

*pulo i apuiBADA awarina. Ma BADA i viamlo-ḡaiḡaini.  
Ma muriai Samuel i ḡetai.*

## 13

*Saul BADA i rau-aḡaiḡaiei*

<sup>13</sup> Samuel Saul i riwei, “Tam u bua! Tam Eḡa BADA ana tarawatu uta voteletelei. Uta votelatela lamna am epaepaia maiteni ita teremi da ota vigulau nonoa au Israel.

<sup>14</sup> <sup>✧</sup>Wate marina tam am vibada eḡa ina mae; BADA rava notanotana me tauna nanare i vinei ma i terei da ana rava ina vibadei, aubaina tam BADA eḡa uta voteletelei.”

## 15

*BADA Saul i geduaiei*

<sup>1</sup> <sup>✧</sup>Muriai Samuel Saul i riwei, “BADA tau i paritawaneu da a buloim da u vigulau Israel aubaii. Lamna aubaina BADA ana riwa ma nonora-kauei.

<sup>2</sup> <sup>✧</sup>BADA Vivirewapana Kaukauana i riwa i pa, ‘Tau mai Amalek ana kovog̫i aubaina amamai mai Israel i viḡavie i maranai Egyptei i opu da i nenei.

<sup>3</sup> Marina ona nae mai Amalek ona viḡavie i ma ona pupuni, eḡa tagogi ona voterei, nelara, waivine, roaroa melamelai, bulumakau, sipu, kamel ma donkey.”

<sup>4</sup> Ma Saul ana sorodia ai riwa i paritawanei da ita nei. Ma anatapui au Telaim taon i vinenebelana. Sorodia 10,000 Judah ana damei i nei ma 200,000 mai Israel ġelauei i nei.

---

<sup>✧</sup> **13:14:** Act 13:22    <sup>✧</sup> **15:1:** 1Sa 10:1    <sup>✧</sup> **15:2:** Exo 17:8-14

<sup>7</sup> Ma Saul ana sorodia maiteni i opu ma Amalek i vunu-naiei ma i vovaiubai, i viḡavia au Havilah ma au Shur i vikwai Egypt au ġeregerena.

<sup>8</sup> Agag mai Amalek ai gulau lawalawaina i vojjini wate rava anatapui i viraġeni.

<sup>9</sup> Wate Saul ana sorodia maiteni Agag eġa ita viraġeni ma ai sipu ma bulumakau vinevinei ma bulumakau ma sipu natunatui aiaii eġa ita viraġeni. Taui ġamogħamo kirakiramai ava i viraġeni.

<sup>10</sup> Ma BADA Samuel i riwei,

<sup>11</sup> “Tau orau i viara kaua da Saul a terei Gulau aubaina tauna i mae-puputeu ma riwau i rauaġaġiae.” Samuel nuanuana i bola-kauei maranai wei riwana i nonori ma BADA awarina i toumaratom.

<sup>12</sup> Ubaubana boibogi Samuel i nae da Saul ita inanai wate i riwei da Saul i nae au Carmel taon. Kampa gana i vidamni da rava ita nei weka da tauna ita voepaepai, ma i ġaira me au Gilgal.

<sup>13</sup> Ma Samuel i ġeta Saul awarina, Saul, tauna i viegħualuei ma i pa, “Samuel, BADA ina viaiainim. Tau BADA riwana a voteletelei.”

<sup>14</sup> Samuel i paribelei, “Aiwai aubaina sipu ma bulumakau e vivitouana a nononori?”

<sup>15</sup> Saul i pa, “Sorodia mai Amalek awarii i vaia, bulumakau ma sipu vinevinei i vojjini da ina puloei BADA am God awarina wate ġelaui anatapui a viraġena-naiei.”

<sup>16</sup> Anina ma Samuel Saul i riwei, “Ma genuana! Waguvarai BADA awariu i babani ana riwem.”

Saul i paridadanei, “Ma riweu!”

**17** Samuel i paribelei, “Avena da u nota-melem da tam rava labalababa, tam marina mai Israel ai rauetaravena. BADA i tereriem da mai Israel ai gulau.

**18** Riwa bagibagina i riwem ma i paritawanem da taniā potapotai mai Amalek uta viḡaviei da anata-pui uta pupuna-pai.

**19** Aiwai aubaina BADA eḡa uta voteletelei? I riwem da eḡa purapura i 'rairaḡe-tawanei ona tami, wate tam vipurapura u ḡoei ma u vai-labalababai da u nuanei, wei lamna kaua apoapoe BADA au matana.”

**20** Saul i paribelei, “Tau, BADA a voteletelei! I egariu da ana nae, da mai Amalek ana pupuni ma ai gulau Agag a neiai.

**21** Wate au sorodia sipu ma bulumakau aiaii eḡa ita viraḡeni wate i neiai weka au Gilgal da ita apui pulo BADA am God awarina.”

**22** Anina ma Samuel i riwa,  
“BADA metauna e vinuaiae?  
Votelatela bo pulo ma ḡamoḡamo apuapunana.  
Votelatela i ai-telara, eḡa me pulo apuapunana;  
Ma rautaniḡana i ai-telara, eḡa me sipu mona-monana.

**23** Pariviravira BADA awarina lamna me parauma  
ma mae-ḡaeḡae lamna me god ḡelaui  
e viviborumei  
Ma tam BADA riwana u geduaiei;  
lamna aubaina BADA am vigulau i geduaiei,  
Tam am vigulau i vai-tawanei.”

<sup>27</sup> <sup>✧</sup>Ma Samuel i mae-tavirei da ita nae ma Saul i ġoei da ita viġaei ma ana kwama adana i vojjini ma i sikai.

<sup>28</sup> Samuel i riwa, “Me au ġara u sikasikai nanare amadodo BADA am vibada mai Israel awarii i vaitawanei ma rava ġelauna aiaina eġa me tam i verei.

<sup>29</sup> Israel ai God vinualaulaunana eġa morumoruna bo nuanuana ita viravirai. Tauna eġa rava da nuanuana ita viravirai.”

<sup>34</sup> Ma Samuel i nae au Ramah ma Saul i nae me ana au numa au Gibeah.

<sup>35</sup> Samuel eġa Saul ita inana-melei da i ’raġe wate Saul i vinuabolana-maelei. Ma BADA nuanuana i bola-kauei da Saul i terei mai Israel ai gulau.

## 16

### *BADA David i terei gulau*

<sup>1</sup> BADA Samuel i riwei, “Amapo da Saul ma mogumoguei bo? Tau Saul a vaitawanei mai Israel ai gulau. Wate olive monamonana ma vaia ma ma nae au Bethlehem ma Jesse ma inanai. Natunatuna awariei gulau a vinei.”

<sup>2</sup> Wate Samuel i paribelei, “Menanare ana naenei? Saul riwana ina nonori ma ina viraġeniu.”

BADA i riwa, “Cow ġaubona ma vinimavoei ma ma nae da ma riwa, ‘Tau a nei viturana pulona ana apui BADA awarina.’

<sup>3</sup> Jesse ma rauġorei viturana pulona aubaina ma ana viatataiem aiwai ma kauei, rava ana viatataiem ma buloi Tau aubaiu.”

---

<sup>✧</sup> **15:27:** 1Ki 11:30-31

<sup>4</sup> BADA Samuel i ririwei nanare i kaeui. Samuel au Bethlehem i ġeta ma taun babadai ana sisisi i nebelei. Ma i paridadanei, “Ana nuaubam u nei bo?”

<sup>5</sup> Samuel i paribelei, “Ee! A nei da pulo ana apui BADA awarina. Anatapumi ona vokaukauana-melemi ma tana nae pulo aubaina. Ma Jesse natunatuna maiteni i viaiaini ma i paritawanei da i nae pulo apuna aubaina.”

<sup>6</sup> Maranai taui i ġeta ma Samuel Jesse ana natuevou Eliah i ’nanai ma ana au nota i riwa i pa, “Wei teverana e maimairi BADA au naona lamna anina ana vinevine.”

<sup>7</sup> Wate BADA Samuel i riwei, “Tau ravana a geduaiei, eġa inanana bo ana manawa ma notanotai. BADA aiwai e inainanai, rava eġa ita inananai. Rava tupua e inainanai wate Tau nuapou a inainanai.”

<sup>10</sup> Nanare da natunatuna anatapui 7 i nei, ma Samuel i riwa, “BADA eġa aiai ita vinei.”

<sup>11</sup> Ma Jesse i paridadanei, “Natunatum anatapui weka bo?”

Jesse i riwa, “Natu umau e mamae wate tauna sипу e paipaini.” Samuel Jesse i riwei, “Riwa ma paritawanei da ina ġetai da tana am.”

<sup>12</sup> Ma Jesse riwa i paritawanei da i nei. Tauna i tupua karawata, tevera inanana aiaina ma matana namanamarana. BADA Samuel i riwei, “Wei tauna! Ma nae ma au kolana olive monamonana ma iwaġi.”

<sup>13</sup> Anina ma Samuel olive monamonana i vaia ma David au kolana i waġi, kampa taui au matai,

ma nai au marana da i nenaе BADA ana Arua Vivivireina David maiteni i mae. Ma Samuel i nae au Ramah.

<sup>14</sup> Ma BADA Aruana Saul i opu-tawanei ma BADA arua apoapoei i paritawanei i rui au orana da i virovorovoi.

*David marina Gulau Saul ana sorodia.*

## 18

### *Saul David i unurei*

<sup>5</sup> Saul, David ġavia au anatapuna i paripari-tawanei ma i kaukauana-kauei ma ġavia i vovovaiubai ma lamna aubaina i terei da ai sorodia ai bada ġaeġaena. Ma wei kauana patara ma sorodia babadai i vinuaiaeи.

<sup>6</sup> David oroto Philistiei ġaeġaena ma inanana vi'nirovorovona i viraġeni ma i nenememei ma waivine taon anatapuie i nei ma ketaketara ma gitā i vikalokaloei ma i arara ma gulau Saul i nebelei.

<sup>7</sup> Waivine i vikalokalo ma i welawela i pa;  
“Saul ġavia tausan i vunui  
ma David tausan dam viriviri i vunui.”

<sup>8</sup> Wei welana Saul i vimeji-kauei ma ana au nota i pa, “Taui David e vovoepaepai ma e ririwa da tauna rava tausan dam viriviri i vunui ma tau tausan ava.” Ma marina ina terei ai gulau.

<sup>9</sup> Ma lamna aubaina tauna David i unurana-kauei ma i 'nana-vaitetei.

*Wei au marana Saul David i viviġavie i goei da ita viraġeni. Saul natuna Jonathan, David i vibenabenamei. Lamna aubaina i rovorovo-nae ma i rauraugovaġa-nae.*

## 21

*Wei marana au murina Saul David i viḡavie i ma  
i ġoei da ita viraġeni. Saul natuna - Jonathan David  
i vibenabenamei ma David i ruba au dobū ġela da Saul  
ita raugovaġei.*

### *Ahimelek David i voaqui*

<sup>1</sup> <sup>✳</sup>David i nae au Nob da Pirisi pulo tauapuna Ahimelek ita inanai. Tauna ana rovona i opu da David i viegualaei, ma i riwa, “Aiwai aubaina u nei, ma am rava mepa?”

<sup>2</sup> David pirisi Ahimelek i paribei i pa, “Gulau Saul nola tagogi aubaina i paritawaneu wate wenanare i riweu, ‘Eġa aiai ina aramanei aiwai a kaukauei.’ Au sorodia a riwei da e paipainiu.

<sup>3</sup> Awarim lam da uta vereu? Palawa apua-punana 5 ma vereu bo aiwai ġelauna kampa.”

<sup>4</sup> Wate pirisi i riwa, “Awariai eġa palawa ota ita mamae, wate vovivirana BADA awarina. Wei palawana ma vaia mepa da am sorodia aupom biaġa eġa waivine maiteni ita viawawana.”

<sup>5</sup> David i paribelei, Riwa kaua tauai eġa waivine maiteni ata matamatave, maranai a opuopu ġavia aubaina au nelara e ujiuji. Amadodo lamna gulau ana nola a kaukauei ma wei nolana aubaina a vokaukaua kaua.

<sup>6</sup> Nai marana palawa waduboi i votawanaei ma palawa voui i terei BADA au naona au tempol. Kampa eġa lam ġelauna ita mamae ma pirisi palawa vovivirana David i verei.

*Anina ma David rava i tama-naiei ma nai au  
dobuna i raugovaġa nae ma i terei ai bada. Maranai  
Saul i nonori da pirisi ġeġetelarana Ahimelech David*

---

<sup>✳</sup> **21:1:** Mrk 2:25-26

*i voagui, Tauna pulo tauapui pirisi i vunu-pai ma Abi-athar lawalawaina i voterei, ma tauna i ruba govaña da David awarina i ġeta. Maranai dobuġela ai sorodia Israel i viġavie, lamna David ana sorodia maiteni taui i viġavie ma Israel i gagaloei. Saul ana sorodia maiteni dobuna i naeni ma David i baiei da ita viraġeni, wate eġa ita nelaġai. Mara tagogi David Saul ita viraġeni wate lamna eġa ita kauel aubaina tauna God ana vinevine. Wate Saul amapo i ġoei da David ina viraġeni.*

## 31

### *Saul ana iraġe*

<sup>1</sup> Mai Philistia mai Israel i viġavie au ola Gilboa ma taui mai Israel i virubai ma maġamaġaui i viraġeni.

<sup>2</sup> Mai Philistia Saul ma natunatuna i viaġaġei da natunatuna Jonathan, Abinadab ma Malki-Shua i viraġeni.

<sup>3</sup> Ĝavia i potopoto kaua Saul au ririvana ma ġavia ana piduei Saul i tonai ma i vikero-kauei.

<sup>4</sup> Ma Saul ana apia tauavaraina i riwei, “Am sodei ma viraġeniu. Eġa ata ġoei da Philistia-eteni ina vijibogiu ma ina virageniu.”

Wate tauna i rovo da viraġenana i kauana-avei. Ma Saul ana sod i lavui da au manawana i tonei ma au tepana i peu da i ’raġe.

<sup>5</sup> Maranai ana apia tauavaraina wei i ’nanai ma tauna nanare ana sod au tepana i peu ma gulau au ririvana i ’raġe.

**Wedau Mark**  
**The Gospel of Mark in the Wedau Language of Papua**  
**New Guinea**  
**Buk Mak long tokples Wedau long Niugini**

copyright © 2010 Wycliffe Bible Translators, Inc.

Language: Wedau

Translation by: Wycliffe Bible Translators

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2017-08-30

---

PDF generated using Haiola and XeLaTeX on 28 Dec 2024 from source files  
dated 31 Aug 2023

aa19f3e3-98fb-51fa-9c53-3906edc75f11